

1 Wäö

cadota ante nänö tänota yewämongainta

Mīni quēwenguinö ante nē pönongä

1 ¹Æcänö wēēnēñedē Wængonguī nänö badongaiñedē do ingacäimpa, ante mäninö ante apænemönipa. Wængonguī nänö Angainö ante nē emongaingä iñömö Itota adocä, Mīni quēwenguinö ante nē pönongä ingacäimpa. Mönitö iñömö mäningä apäñecä ēñēñinque tömengä ingante awinca inte nē adimöni imönipa. Adocä ingante cöwä adinque mönitö tömengä ingante nē gampodimöni imönipa. Īninqe möni nē ēñēningä ingante ante, awinca inte möni nē adingä ingante ante, möni nē cöwä adingä ingante ante, möni nē gampodingä ingantedö ante apænemönipa. ²Edä Itota nē quēwengaingä iñömö edonque pönī a ongongacäimpa. Mönitö tömengä ingante nē adimöni imönipa. Mäningä ingante ante, Näwangä quēwengaingä ingampa, ante apænemöni imönipa. Ayä mönö Mæmpo Wængonguī tönö guëa cöwē quēwengaingä iñömö tömengä mönö weca ponte a ongongä atamönipa. Īninqe mīnitö iminite mäningä ingante ante apænemöni ēñencämīnimpä. ³Ayä mönö Mæmpo Wængonguī tönö tömengä Wengä onguīñængä Itota Codito tönö mönitö godongämæ cämöni imönipa. Īninqe, Mīnitö adobaī mönitö tönö godongämæ cæcämīnimpä, ante cædinque mönitö möni nē adingä ingante ante, möni nē ēñēningä ingante ante mīnitö iminite apænemöni ēñencämīnimpä. ⁴Mönö eyepæ watapæ toquinque ante mäninö ante mīnitö iminite yewämömönipa.

Wængonguī ñäö apäite
baī inongä ingampa

⁵Tömengä nänö angainö möni ēñēñinö æbänö ī, ante mönitö ĩimai ante mīnitö iminite apænemöni ēñencämīnimpä. Wængonguī ñäö apäite baī inongä ingampa. Īninqe tömengä wentamö nänö entawenö edæ dæ ampa. ⁶Wentamö iñömö nē cægömö ĩninqe mönö, Tömengä tönö godongämæ cämönipa, ante ämö ĩninqe mönö edæ nē babæ ämö ĩmaimompa töö. Ayä mänömaī cämö ĩninqe mönö, Quinö nöingä impä, ante cædämaī ĩmaimompa. ⁷Wængonguī ñäö apäiyömö mänīñömö ongongä baī mönö adobaī ñäö iñömö cægömö ĩninqe mönö wacä ingä wacä ingä godongämæ cæbaïmompa. Ayä ñäö iñömö cægömö ĩninqe mönö wēnæ wēnæ cægäinö tömää adinque tömengä Wengä Itota nämä wepæ inte mönö imonte mēnongacä ate mēnongate ĩmaimompa. ⁸Mönö, Botö wēnæ wēnæ cæpämö dæ ampa, ante ämö ĩninqe mönö nämä incæ oda cæte wapiticæ go baī cæbaïmompa. Ayä mänömaī äninque mönö, Quinö nöingä ī, ante ewocadämaī quēwēmaïmompa töö. ⁹Wæætē edæ Wængonguī mönö imonte cöwē pönēñinque nē ædæmö cæcä ĩnongä ingampa. Ayä nē nö cæcä ĩñongante mönö tömengä ingante, Botö nämä wēnæ wēnæ cædīmo inte awædö, ante ämö ēñēñinque tömengä wæætē pīñämaī inte mönö imonte pönö ñimpo cæcä quēwencämöimpä. Ayä wīwa mönö cæte quēwēnö tömää

adinqwe tōmengä wæætē mönō imonte mēnongacæcäimpa. ¹⁰Mönō, Botō cōwē wēnæ wēnæ cædāmaī ingaimo imopa, ante ämō ininque Wængongui ingantedō ante, Babæ änongä ingänō, ante ämaimompa. Ayæ mänōmaī ämō ininque tōmengä nänō angainō ewocadāmaī quēwēmaimompa tōō.

Mönō Codito wææ angä beyænque mönō quēwenguinque

2 ¹Botō wēñämīni bai imīni ēñēedāni. Mīnitō wēnæ wēnæ cædāmaī incæminimpa, ante iīmaī ante cædinque yewæmōmopa. Incæte adocanque wēnæ wēnæ cæcantawo. Tōmengä beyæ wacä, Mæmpo Wængongui pänāmaī incæcäimpa, ante mönō nē wææ änongä incæ mä ongongampa. Mäningä iñömō nē Nō Cæcä inongä inte Itota Codito inongä ingampa. ²Ayæ idægoidi, Mönō wēnæ wēnæ cægäinō ante mönō imō Wængongui pīnāmaī incæcäimpa, ante cædinque cæningä wænönāni nänō wængai bai mäninganque adobaī mönō wēnæ wēnæ cægai beyæ wængacäimpa. Ayæ wīi ononque mönō wēnæ wēnæ cægäinonque beyænque wæætē tōmāmæ quēwēnāni nāni wēnæ wēnæ cægai beyæ adobaī wængacäimpa.

³Mönō Wængongui ingaingä ingante ate bai pönēmōō, ante æbänō cæte ēñenguii. Edæ, iīmaī cæedāni, ante Wængongui nänō wææ angainō ante ēñente cæmō ininque mönō edæ, Wængongui ingante ate bai nē pönēmō imompa, ante do ædæmō ēñēmaimompa. ⁴Wacä iñömō, Wængongui ingaingä ingante ate bai pönēmo imopa, ante nē angä incæte tōmengä Wængongui nänō, iīmaī cæedāni, ante wææ nänō angainō ante ēñēnāmaī cæcä ininque mäningä nē babæ änongä ingampa. Ayæ Wængongui nōingä nänō angainō ante ewocadāmaī quēwengampa tōō. ⁵Wæætē, Wængongui nänō angainō ante æcänō ēñente cæda iñömō mäningä ingante Wængongui pönō cæcä beyænque tōmengä Wængongui waadete nänō pönēnō

ante eyepæ entawente quēwengampa. Ininque Wængongui nänō angainō ante ēñente cæmō inte mönō, Tōmengä nempo quēwēmō imompa, ante ædæmō ēñēmompa. ⁶Ininque æcāmenque, Botō tōmengä nempo nē quēwēmō imopa, ante nē angä iñömō tōmengä Itota nänō quēwente cægōni bai adobaī quēwente cægonguēnē ingampa.

Itota, iīmaī cæedāni, ante ñōwo nänō wææ äno

⁷Botō nē waademīni ēñēedāni. Mīnitō imīnite, iīmaī cæedāni, ante wīi botō tōmēmō wææ äno ante ñōwo yewæmōmopa. Wæætē Itota do nänō wææ angainō ante wēēñēedē mīni ēñente ængainō ante adodō ante yewæmōmo aedāni. Ii tōmengä do nänō wææ angainō iñömō mīnitō imīnite möni apænedō mīni ēñēinō impa. ⁸Incæte mīnitō imīnite Itota, iīmaī cæedāni, ante ñōwo nänō wææ äno yewæmōmopa. Tōmengä tönō mīnitō quēwente cædinō beyænque, Mäninō nō pōni impa, ante edonque pōni acäimpa. Edæ mönō wēmō iñömō wodēmāa tæcæ bacæ cæyō nō ñäō iñömō tatodonte do apäite impa.

⁹Botō ñäō iñömō quēwēmō imopa, ante nē angä incæte tōmengä nänō tōniñacä ingante nē piingä ingä ininque tōmengä wēmō iñömō ayæ quēwengampa. ¹⁰Æcänō guiquēnē nänō tōniñacä ingante nē waadete pönengä tōmengä ñäō iñömō nē quēwengä ingampa. Tōmengä ñäō iñömō quēwēninque quiēmē beyænque edæ tēwate goquingä. Edæ dæ ampa. ¹¹Wæætē æcänō nänō tōniñacä ingante nē piingä wēmō iñömō quēwengampa. Tōmengä wēmō iñömō cægongä inte compocæ compocæ gocä ingampa. Wēmō iñömō quēwēninque babetamongä bagaingä inte tōmengä ædönō gocä, ante ēñēnāmaī ingampa.

¹²Wēñämīni ēñēedāni. Edæ Itota Codito emōwo beyænque mīni wēnæ wēnæ cægäinō ante ñimpo cæte quēwēmīni imīnipa, ante adinqwe

botö mīnitö imīnite yewæmömopa.

¹³Mæmpomīni ēñēedāni. Mīnitö edæ, Wēñēñedē nē ingaingā ingante do ate bai pōnengaimīni imīni beyænque botö mīnitö imīnite yewæmömopa. Onguiñæmīni tæcæ pæmīni ēñēedāni. Mīnitö edæ godōmenque tæi emōmīni imīni inte wænæ awēñē ingante Baa ante gānā cæmīni beyænque botö mīnitö imīnite yewæmömopa. Wēñæmīni ēñēedāni. Mīnitö edæ mōnō Mæmpo Wængongui ingante do ate bai pōnengaimīni imīni beyænque botö mīnitö imīnite yewæmömopa.

¹⁴Mæmpomīni ēñēedāni. Mīnitö edæ wēñēñedē nē ingaingā ingante do ate bai pōnengaimīni imīni beyænque botö mīnitö imīnite yewæmömopa. Onguiñæmīni tæcæ pæmīni ēñēedāni. Mīnitö edæ tæi emōmīni inte ayæ Wængongui nānō angainō cōwē ewocate quēwēmīni imīnipa. Adobaī mīnitö edæ wænæ ingante godōmenque tæi emōmīni inte Baa ante gānā cæmīnipa. Mānōmaī beyæ botö mīnitö imīnite yewæmömopa.

¹⁵Inguipogaque ante nāni quēwēmāmo ante waadete pōnēnāmaī iedāni. Inguipoga quēwēnāni quiēmē wænæ wænæ nāni cæpāmo ante tōmāmāmo ante adobaī waadete pōnēnāmaī iedāni. Ayæ æcānō īi inguipogaque ante nāni quēwēmāmo ante waadete pōnente ina māningā mōnō Mæmpo Wængongui nānō waadete pōnēnō ewocadāmaī quēwengā ingampa. ¹⁶īi inguipoga iñōmō æbānō ī, ante acæimpa. Edæ wænæ wænæ cædāni quiēmē beyæ nāni æinente wædō ī, awinca inte adinque nāni æinente wædō ī, ante wīi mōnō Mæmpo Wængongui pōnō cæcā ate æinēnānipa. Tōmēnāni, Māincoo nanguī ēamōni imōni aedāni, ante cædānipa. Ayæ, Nanguī cæmōni aedāni, ante cædānipa. Incæte tōmāā māniī nāni æinēnō wīi mōnō Mæmpo Wængongui pōnō cæcā ate æinente badānipa. Wæætē inguipoga iñōmō nē mā cædāni inte quiēmē wænæ wænæ nāni cæpāmo ante adinque wadāni dobæ wænæ wænæ cæinēnāni badānipa.

¹⁷Inguipoga mōnō quēwēñōmō incæ māninguipogaque ante quēwēnāni nāni cæinēnō incæ oo pōni dæ baquinō anguēñē. Wæætē waocā, Wængongui nānō angainō ante nē ēñente cæcā inte wantæpiyæ wænāmaī quēwencæcæimpa.

**Quinō nōingā ante impa,
quinō babæ ante impa**

¹⁸Wēñæmīni ēñēedāni. Īinque baquiōnæ mōnō äōnæ oo batimpa. Māniōnæ iñōnte Codito ingante wacā nē piinte cæcā iñōmō, Botō Codito imōpa, ante nē ānewēnongā ponguingā, ante ēñēmīnitapa. Edæ māninō mīni ēñēnīnō bai ñōwoōnæ incæ nanguī ināni Codito ingante nē piinte cædāni iñōmō, Botō Codito imōpa, ante nē ānewēnōnāni inte edæ do pōnānitapa. Mānōmaī ī Īinque edæ, Īinque baquiōnæ do bapa, ante mōnō ēñengæimpa. ¹⁹Mānināni iñōmō mōnō imonte emō cæte godānitapa. Incæte tōmēnāni wīi nō mōnō pōnencabo adocabo ināmaī inānitapa. Edæ mōnō pōnencabo adocabodāni inināni inte bai tōmēnāni edæ wadæ godāmaī inte mōnō tōnō ayæ a ongoncædōnānimpa. Wæætē do godāni adinque mōnō, Mānināni tōmānāni mōnō cabo ināmaī inānitapa, ante edonque pōni acæimpa.

²⁰Edæ ogui wapæ gadoncadāni encadāni bai mōnō Tæiyæ Wæmō inongā iñōmō edæ tōmengā Ōnōwoca ingante mīnitonga angā pō guicā ate mīnitō tōmāmīni tōmengā ingante entawēninque, Quinō nō ī, ante ēñēmīnipa. ²¹Mīnitö imīnite yewæmōninque botö dica, Mīnitö, Quinō nō ī, ante ēñēnāmaī imīnipa, ante yewæmōmogaa. Wæætē edæ, Mīnitö, Quinō nō ī, ante ēñēmīnipa, ante adinque botö mānōmaī beyæ ante yewæmömopa. Ayæ babæ nāni āniñō tōnō Wængongui nōingā nānō angainō tōnō ædō cæte guēa inguīnaa, ante ēñēmīni adinque botö mānōmaī beyæ ante yewæmömopa. ²²Babæ ante nē ānewēnongā æcānō ingantawo. Edæ Itota incæ wīi mōnō Codito ingaingā

ingampa, ante nē angä iñömö tömengä nē babæ anewēnongä ingampa. Mäningä wæætē, Botö Codito inömo imopa, ante Codito ingante nē piinte cæcä ingampa. Tömengä edæ mönö Mæmpo Wængonguī tönö tömengä Wengä Itota Codito nāna Mæmpocaya inate Baa angampa. ²³Īi Wengä onguīñængä ingante Baa äninque, Itota incæ wīi mönö Codito ingaingä ingampa, ante nē äñāni iñömö ædö cæte Mæmpo Wængonguī nempo quēwēnönāni inguinānii. Wæætē tömengä Wengä ingante æcänö Ao äninque, Itota mönö Codito ingaingä ingampa, ante nē angä guiquēnē tömengä Mæmpo Wængonguī nempo nē quēwēnongä ingampa.

²⁴Minitö guiquēnē, Quinö angainö, ante wēēñēdē mini ēñengainö ante ñöwo godömenque minitö mimönē entawente quēwēedäni. Mäninö ante godömenque entawēmīni inte minitö Itota Codito tömengä Mæmpo Wængonguī nāna Mæmpocaya tömēna nempo cōwē quēwenguīmīni iminipa. ²⁵Mönö imonte Wængonguī, Cōwē cæcæboimpa, ante cædinque iīmaī angacäimpa. Minitö wantæpiyæ cōwē wænāmaī quēwencæmīnimpa.

²⁶Wadāni, Minitö incæ oda cæcæmīnimpa, ante nē cædāni iñönānite botö minitö iminite mäninö ante yewæmömopa. ²⁷Codito tömengä Önöwoca ingante do pönongä ewocamīnipa. Tömengä ingante cōwē ewocamīni iñöminite wacä ædö cæte minitö iminite odömonte apænequingää. Tömengä Önöwoca incæ tömänö ante odömonte apæneçä ēñencæmīnimpa. Ayæ tömengä nänö odömonte apænedö iñömö nö pönī īi inique edæ wīi babæ äninö impa. İninque minitö tömengä mänömaī nänö odömonte apænedinö baī cædinque godömenque mönö Itota Codito nempo quēwēedäni.

²⁸Mänömaī beyæ botö wēñæmīni baī imīni ēñēedäni. Tömengä nempo godömenque quēwēedäni. Edæ, Tömengä pongä mönö aquioñæ mönö guīñēnāmaī ingæimpa, ante

cædinque ayæ, Tömengä ponguioñæ mönö tömengä weca ongöninque guingo imönāmaī ingæimpa, ante cædinque godömenque tömengä nempo quēwēedäni. ²⁹Edæ minitö, Itota Codito nö nänö cæte ingainö ante ēñēmīni inique edæ minitö iīmaī ante adobaī do ēñēmaimīnipa. Quinö waa impa, ante nē cædönāni tömänāni mempoga ēñagaināni inte Wængonguī wēnāni inānipa.

Wængonguī wēnāni

3 ¹Mönö Mæmpo Wængonguī incæ æbänö mönö imonte nangui pönī nē waadete pönēnongä inte cægacäimpa, ante apænebo ēñēedäni. Edæ mönö imonte, Botö wēmīni imīni ämopa, ante angacäimpa. İninque näwangä mänimönö imompa. Inguipogaque quēwēnāni iñömö, Mönö Mæmpo Wængonguī ingante wīi adinque pönēnāmaī inānitapa. Mänömaī beyæ mönö imonte adobaī adāmaī ināni inte baī pönēnāmaī inānipa. ²Botö nē waademīni ēñēedäni. Nöwoyedē Wængonguī wēmö inömö inte mönö ayæ ate æbänö baquimöö, ante ayæ wīi edonque amompa. Wæætē, tömengä nänö pöönæ mönö aquioñæ tömengä nänö ingaī baī mönö adobaī bacæimpa, ante ædæmö ēñēmompa. Edæ tömengä æbänö ingaingä ingää, ante mönö edonque acæimpa. ³Edæ, Tömengä beyænque mänömaī bacæimpa, ante nē pönente todāni tömänāni, Itota Codito tæiyæ waēmö nänö ingaī baī mönö adobaī tæiyæ waēmö bacæimpa, ante nämä incæ cædānipa.

⁴Nē wēnæ wēnæ cædāni tömänāni Wængonguī nänö, İimaī cæedāni, ante nāni yewæmongainö ante Baa ante nē ēñēnāmaī cædāni inānipa. Edæ wēnæ wēnæ nāni cægainö incæ Wængonguinque ingante Baa ante nāni angainö impa. Mäninö ante nö ante impa. ⁵Minitö do ēñēmīnipa. Tömengä edæ mönö wēnæ wēnæ cægainö ante mönö imonte, Nīmpo cæbo quēwenguīmīni, ante cæcæte ante

cædinque ëñagacäimpa. Ayæ tömengä wënæ wënæ cædö entawënämaingä ingampa. ⁶Ayæ edæ tömengä nempo nè quëwënönäni tömänäni wii godömenque wënæ wënæ cædäni inänipa. Godömenque nè wënæ wënæ cædönäni guiquënë tömengä ingante adämaï inönäni inte pönënämaï ininäni inänipa töö. ⁷Wëñämini ëñeedäni.

Wacä minitö iminite, Wapiticæ gote oda cæquimini, ante nè mäocæ cæcä ingante gomö aedäni. Wæætë, Quinö waa impa, ante nè cæcä guiquënë tömengä Itota Codito nö nänö cæte ingai bai adobaï nö cædongä inongampa. ⁸Në wënæ wënæ cæcä guiquënë wënæ päingä bai inte adocä nempo quëwengampa. Edæ wëenëñedë wënæ awënë nänö wënæ wënæ cægai bai cöwë wënæ wënæ cæcampa. Mänömaï beyæ Wængongui Wengä inömö wënæ awënë nänö wënæ wënæ cægainö ante wo ëwencæte ante inguipoga ponte ëñagacäimpa.

⁹Wængongui wënäni tömänäni wii godömenque wënæ wënæ cæquinäni inänipa. Edæ tömëmö guidimö bai minte bai cædinque Wængongui nänö quëwënö ante da pönongä æninque tömënäni cöwë entawente quëwënänipa. Tömënäni edæ Wængongui wënäni inte ædö cæte godömenque wënæ wënæ cæquinäni. ¹⁰Æcänö, Quinö waa impa, ante nö cædämaï inaa tömengä wii Wængongui wengä ingampa. Ayæ æcänö tömengä nänö töninacä ingante nè waadete pönënämaï inaa tömengä adobaï wii Wængongui wengä ingampa. Wængongui wënäni ædänidö inäni, ante ayæ, Wënæ wënäni ædänidö inäni, ante mönö mänömaï beyænque edonque pönö ëñëmompä.

**Wacä ingä wacä ingä mönö
waadete pönengäimpa, ante**

¹¹Minitö mä mini pönëñedë mini ëñengainö iïmaï ante impa. Wacä ingä wacä ingä mönö waadete pönengäimpa. ¹²Minitö Cäinö wodi bai wii iedäni. Mäningä edæ wënæ nänö päingä bai ingaingä inte tömengä nänö töninacä

ingante näëmæ wænongä wængacäimpa. Ayæ quinante tömengä ingante wænongacäi. Edæ tömengä nämä nänö cæinö wënæ wënæ cæinonque inönte, Tömengä töninacä nänö cæinö wæætë nö cæinonque i, ante adinque mänömaï beyænque Cäinö wodi tömengä nänö töninacä ingante wænongacäimpa.

¹³Botö töninamini ëñeedäni.

Inguipogaque quëwënäni minitö iminite ancaa pïinäni adinque minitö wæætë, Quinante pïinäni, ante wædämaï iedäni. ¹⁴Mönö töninadäni inänite nè waadete pönëmö beyænque, Mönö nè wænguënëmö inte mönö wæætë mii quëwëmö imompä, ante edonque ëñëmompä. Në waadete pönënämaï ingä guiquënë tömengä inömö mönö wænguënëmämö cöwë ëmö cædämaï ingampa töö. ¹⁵Æcänö tömengä töninacä ingante pïina tömengä inömö nè wænongä bai ingampa töö. Ayæ, Në wænongä inongä inte tömengä nänö wantæpiyæ wænämaï quëwenguimämö ante ædö cæte entawente quëwenguingäa, ante do ëñëminipa.

¹⁶Näwangä waadete pönëninque æbänö cæquii, ante mönö iïmaï ante ëñengäimpa. Edæ, Itota Codito nämä incæ mönö beyænque wængacäimpa, ante adinque mönö, Mänömaï waadete pönente cæquii impa, ante ëñëmompä. Ininque mönö adobaï mönö töninadäni beyænque ante mönö nämä incæ Ao æninque wænguënëmö imompä. ¹⁷Mäincoo nè ëacä inömö tömengä töninacä nänö quëwenguinö ante wii eyepë ëacä acä incæte tömengä ingante waadete cædämaï ingantawo. Edæ nè ëacä incæ ædö cæte Wængongui nänö waadete pönënö entawengä ingantawogaa. ¹⁸Wëñämini ëñeedäni. Mönö, Waodäni inänite botö waadete pönëmö imopa, ante tedemö incæte wii mäninö önöne mönö tededö beyæ mönö nöingä cæte waadete pönëmö imompä. Wæætë edæ waodäni beyæ godö cædinque mönö nöingä waadete pönengäimpa.

**Wængongui weca ongonte
mönö guinänämaï ingäimpa**

¹⁹Mänömaï cæmompä, ante adinque mönö, Wængongui nöingä nänö

angainō bai quēwēmō imompa, ante do ēñēmompa. Ayæ adobaī, Tömengä weca mönō a ongōñedē nämä guiñēnāmai incæmōimpa, ante ēñēmompa. ²⁰Botō pante wæquinque wēnæ wēnæ cæbopa, ante mīmōnē nämä apænte ämō incæte iīmai ante adobaī ēñēmompa. Wængonguī edæ wīī mönō mīmōnē ēñēnō bai inongä inte tömengä godömenque nē ēñēnongä ingampa. Ayæ tömengä tömäā ēñengaingä ingampa.

²¹Botō nē waademīni ēñēedāni. Botō pante wæquinque wēnæ wēnæ cæbopa, ante mīmōnē nämä apænte änāmai imō ininque mönō Wængonguī weca ongōnīnque guiñēnāmai imaimompa. ²²Ayæ tömengä, iīmai cædāni, ante nānō wææ angainō ante ēñente cæmō ininque ayæ, Cæmō adinque tömengä tocæcäimpa, ante cæmō ininque tömengä ingante quiēmē beyæ ante ämō tömengä wæætē pönō cæcä æmaimompa. ²³Tömengä nānō wææ angainō iīmai impa. Botō Wengä Itota Codito emōwo ante pönēedāni. Ayæ tömengä mönō imonte, Botō wææ angainō bai wacä ingä wacä ingä waadete pönēedāni. ²⁴Mänömainō ante Wængonguī nānō wææ angainō ante nē ēñente cædāni iñömō tömēnāni tömengä nempo quēwēnōnāni inānīpa. Ayæ adobaī tömēnāni tömengä ingante entawēnānīpa. Wængonguī tömengä Önöwoca ingante pönongä ænimō inte mönō mäningä tömengä nānō pönongaiwoca beyæ, Wængonguī ingante entawēmō imompa, ante do ēñēmompa.

**Æcänō önöwoca ingante
ewocadāni, ante**

4 ¹Botō nē waademīni ēñēedāni. Wadāni, Wængonguī Önöwoca incæ mönitonga pō guicä ininque ewocamōni imōnīpa, ante nē änāni incæte mīnitō wīī tömēnāni nāni änō pönēedāni. Wæætē, Tömēnāni önöwoca Wængonguī weca owodīnque pōwocacantawo, ante ēñencæte ante apænte aedāni. Edæ Wængonguī beyænque nē apænemōnīpa,

ante nē babæ änewēnōnāni nanguī ināni imæca quēwēnāni weca godānīpa. ²Mīnitō edæ, Māniwoca näwangä Wængonguī Önöwoca ingantawoo, ante ēñencæte ante iīmai ante edonque pōni ēñencæmīnīpa. Edæ, Itota Codito Waocä ēñate pongaingä ingacäimpa, ante änāni adinque mīnitō, Tömēnāni tömānāni Wængonguī weca nē pōwocacä ingante nē ewocadāni inānīpa, ante ēñencæmīnīpa. ³Wæætē Itota ingantedō ante adodō ante nē änāmai ināni quiquēnē tömēnāni tömānāni edæ Wængonguī weca pōwocacä ingante ewocadāmai inānīpa. Tömēnāni nāni nē ewocadongä iñömō tömengä, Itota Codito Waocä ēñate pongaingä ingacäimpa, ante änāmai ingampa. Mäningä iñömō Codito ingante nē piinte cædongä iñömō tömengä poncæcäimpa, ante mīni nē ēñēningä ingampa. Nōwoonæ incæ tömengä do inguipoga mönō quēwēñömō iñömō pongä ataquēedāni.

⁴Wēñæmīni ēñēedāni. Wadāni, Codito ingante nē piinte cædōnāni iñönānite mīnitō Wængonguī quimīni imīni inte godömenque tæi emōmīni imīnīpa. Edæ Wængonguī Önöwoca mīni nē ewocadongä iñömō tömengä godömenque nanguī tæi emongä iñongante wēnæ inguipogaque quēwēnāni nāni nē ewocadongä quiquēnē wædænque tæi emongä ingampa. Ininque mīnitō mänināni nē babæ änewēnōnāni inānite Baa ante cædinque godömenque tæi emōmīni inte gänä cædimīni imīnīpa. ⁵Mänināni inguipoga beyænque quēwēnāni inte mänōmai beyæ inguipoga quēwēnāni nāni pönente änō bai tededāni iñönānite inguipogaque ante quēwēnāni adodāni inte tömēnāni inānite ēñēnānīpa tōō. ⁶Mōnitō Wængonguī quimōni imōni iñömōnite, Wængonguī ingante nē ate pönengä iñömō tömengä mönitō imōnite ēñengampa. Wæætē Wængonguī wengä ināmai inongä quiquēnē tömengä mönō imonte ēñēnāmai ingampa. Mänōmai i ininque edæ waocä adocanque önöwoca

nöingä angä ingante ewocadongä incæ wacä önöwoca babæ angä ingante ewocadongä incæ mönö mäninö beyænque, Æwocadö iï, ante edonque põni ëñemompa.

**Wængonguï waadete
pönengaingä inte**

⁷Botö nê waademini ëñeedäni. Mönö wacä ingä wacä ingä waadete pönengäimpa. Edæ mönö waadete pönönö incæ Wængonguï nänö da põnongainö impa. Tömänäni, Nê waadete pönänäni iñömö Wængonguï wëñäñäni nani mempoga ëñagaincabo inönäni inte Wængonguï ingaingä ingante ate bai pönänäni. ⁸Wæætë nê waadete pönänämaï inäni guiquënë tömënäni Wængonguï ingante wii ate bai pönänäni inänipa. Edæ Wængonguï nê waadete pönengaingä ingampa. ⁹Mönö imonte Wængonguï nänö waadete pönëmämö iïmaï cæte odömongacäimpa. Tömengä edæ, Botö Wengä beyænque quëwencämïnimpa, ante cædinque tömengä Wengä adocanque ingante inguipoga mönö quëwëñömö da põnongä pongacäimpa. ¹⁰Æbänö waadete pönenguïi, ante iïmaï impa. Mönö wii Wængonguï ingante waadete pönënimö imompa. Wæætë tömengä mönö imonte waadete pönengä ingaingä ingampa. Ayæ, Mönö wënæ wënæ cægäinö ante mönö imonte Wængonguï piïnämaï incæcäimpa, ante idægoidi cæningä ingante wänönäni nänö wængai bai Wængonguï adobai mönö wënæ wënæ cægäinö beyænque tömengä Wengä ingante da põnongä põninqe mönö beyæ wæætë wængacäimpa.

¹¹Botö nê waademini ëñeedäni. Wængonguï edæ mönö imonte mänömaï nê waadete pönengaingä ingampa, ante adinqe mönö adobai wacä ingä wacä ingä waadete pönenguënëmö imompa. ¹²Mönö waocabo tömämö Wængonguï ingante cöwë adämaï imompa. Incæte mönö wacä ingä wacä ingä waadete pönëmö ininque Wængonguï ingante

entawente quëwëmaïmompä. Ayæ adobai wacä ingä wacä ingä waadete pönëmö ininque tömengä põnö cæcä beyænque mönö tömengä nänö waadete pönönö ante eyepæ entawente quëwëmompä. ¹³Mönö tömengä nempo quëwëmö inte tömengä ingante adobai mönö entawente quëwëmompä. Wængonguï tömengä Önöwoca ingante mönö imonte põnongä ængamöimpa. Mänömaï beyæ mönö mäninö ante do ëñemompa. ¹⁴Mæmpo Wængonguï tömengä Wengä ingante äninque, Inguipoga quëwënäni tömänäni inänite bitö æmi beyænque quëwenguïnäni, ante cæcæbiimpa, ante da põnongä pongantapa. Pongä adinqe mönitö nê adimöni inte wadäni inänite mäninö ante apænemöni ëñencädänimpa. ¹⁵Æcänö, Itota Codito Wængonguï Wengä ingaingä ingampa, ante äna iñömö tömengä Wængonguï ingante entawente quëwengampa. Tömengä adobai Wængonguï nempo quëwengä ingampa.

¹⁶Ayæ mänii beyæ Wængonguï mönö imonte waadete pönengampa, ante mönö nê ëñënömö inte edæ ædämö pönëmö imompa. Wængonguï iñömö nê waadete pönengaingä ingampa. Tömänäni nê waadete pönente quëwënäni iñömö tömënäni Wængonguï nempo quëwënäni. Wængonguï ingante adobai tömënäni entawente quëwënäni. ¹⁷Wængonguï nänö waadete pönönö ante ædämö entawëmö ininque mönö godongämæ waadete pönëmö beyæ tömengä apænte anguiönæ iñonte guïñänämaï inguimö imompa. Edæ Mæmpo Wængonguï nempo Itota nänö quëwengäi bai mönö imæca quëwëninque adobai quëwëmö inte mäniñedë guïñänämaï inguimö imompa. ¹⁸Nê waadete pönengä iñömö tömengä guïñänämaï ingampa. Wæætë edæ tömengä nänö waadete pönönö æmæwo pæte bai eyepæ ba ininque tömengä nê waadete pönengä inongä inte ædö cæte guïñenguingä. Nê guïñengä guiquënë tömengä nänö

pante wæwenguinö incæ do pante bai wæwengä ingampa. Tömengä nänö waadete pönönö ante wii eyepæ ba inique tömengä æmäwo pædämaï bai ingampa.

¹⁹Wængonguï edæ mönö imonte täno waadete pönengacäimpa. Mänömaï beyæ mönö wæatë waadete pönömö imompa. ²⁰Botö Wængonguï ingante nê waadete pönëmö imopa, ante nê angä iñömö tömengä wæatë tömengä töninacä ingante nê piinte ingä inique tömengä babæ anewënongä ingampa. Edæ mäningä nänö töninacä ingante nê adingä incæ tömengä ingante waadete pönënamäi ingä incæte adocä Wængonguï ingante nê adämaï iningä incæ ædö cæte tömengä ingante waadete pönenguingä. ²¹Ayæ, Iïmaï cæedäni, ante Itota Codito mönö imonte iïmaï angacäimpa. Tömämäni Wængonguï ingante nê waadete pönëmini inte minitö töninadäni inänite adobai waadete pönenguënëmini iminipa.

**Inguipogaque nani quëwënö
ante mönö Baa angäimpa**

5 ¹Tömänäni Itota ingantedö ante, Mönö Codito ingaingä ingampa, ante nê pönënanäni inte Wængonguï wënäni nani mempoga ëñagaincabo inänipa. Ayæ tömänäni Mæmpocä ingante nê waadete pönënanäni iñömö tömënäni adobai tömengä Wengä ingante waadete pönënanäni. ²Mönö Wængonguï wënäni inänite waadete pönëmö imöo, ante ëñencæte ante iïmaï ante do ëñëmompa. Wængonguï ingante waadete pönëmö inique ayæ tömengä, Iïmaï cæedäni, ante nänö wææ angainö ante ëñente cæmö inique mönö, Nê waadete pönëmö imompa, ante ëñëmaïmompa. ³Wængonguï ingante mönö waadete pönönö iñömö iïmaï ante impa. Wængonguï, Iïmaï cæedäni, ante nänö wææ angainö ante mönö ëñente cæcäëimpa. Edæ mäninö ante, Iïmaï cæedäni, ante nänö wææ angainö ante ëñente cædinque mönö wii teëmë mongænte bai baquinque cæmompa.

⁴Edæ Wængonguï wëmö mempoga mönö ëñagaincabo iñömö mönö tömämö inguipogaque ante nani quëwënö ante Baa äninque godömenque täi ëmonte gänä cæmompa. Inguipogaque ante nani quëwënö ante mönö godömenque täi ëmömämö iñömö iïmaï ante impa. Wængonguï ingante mönö wede pönönö beyænque mönö godömenque täi ëmömö inte gänä cæmompa. ⁵Inguipogaque ante nani quëwënö ante Baa ancæte ante æcänö godömenque täi ëmongä inte gänä cæcantawoo. Edæ Itota Wængonguï Wengä ingaingä ingampa, ante nê pönenganque tömengä godömenque täi ëmönongä ingampa.

**Wængonguï Wengä ingantedö
ante nö ante impa**

⁶Nê apænë guiite pongaingä iñömö nämä wepæ petæ petæ wæænte nê gogaingä iñömö mäningä iñömö Itota Codito inongä ingacäimpa. Tömengä wii apænenque inte pongacäi wæatë apænë inte ayæ nämä wepæ inte pongacäimpa. Ayæ Wængonguï Önöwoca incæ tömenganque mäninö ante, Nö ante impa, ante nê apænecä ingacäimpa. Edæ Wængonguï Önöwoca nê nöingä inongä ingampa. ⁷Edæ mëa go adoque inäni mänimpodäni, Nö impa, ante apænete bai nê änäni inänipa. ⁸Edæ Wængonguï Önöwoca incæ æpæ incæ wepæ incæ mëa go adoque mänimpodäni incæ, Nö impa, ante nê apænedäni më öñompa. Mänimpodäni iñömö quiëmë äninque adodö ante nê apænedäni inänipa. ⁹Quiëmë ante waocä incæ, Nö impa, ante nänö apænedinö ante do ëñëmompa. Quiëmë ante, Nö impa, ante Wængonguï nänö apænëgainö quiquënë godömenque waa pönä impa. Edæ Wængonguï tömenganque nänö apænëgainö impa. Edæ tömengä Wengä ingantedö ante Wængonguï, Nö pönä impa, ante nänö apænëgainö impa töö. ¹⁰Æcänö Wængonguï Wengä onguinængä ingante nê wede pönëna iñömö tömengä, Nö impa, ante Wængonguï

nänö apänegainö ante entawente quëwengampa. Wæætë edæ æcänö Wængongui nänö apänegainö ante wii pönëna guiquënë tömengä Wængongui ingantedö ante, Babæ änongå ingänö, ante në angä ingampa. Edæ Wængongui tömengä Wengä ingantedö ante, Nö impa, ante nänö apänegainö ante mäningä iñömö pönënamai ingampa töö. ¹¹Ayæ mäninö ante tömengä, Nö impa, ante nänö apänegainö ante iimai ante impa. Mönö imonte Wængongui, Mïni wantæpiyæ cöwë quëwenguinö, ante pönongä äntamompa. Mäninö mönö quëwenguinö ante tömengä Wengä në quëwëngongä inte mönö imonte pönongä änimö inte entawente quëwëmompa. ¹²Tömengä Wengä nempo në quëwengä iñömö tömengä wantæpiyæ nänö quëwenguinö do entawente quëwengampa. Wængongui Wengä nempo në quëwënamai ingä guiquënë tömengä wæætë wantæpiyæ nänö quëwenguinö änamai ingampa.

Wäö iinque nänö angainö

¹³Minitö Wængongui Wengä ëmöwo ante në pönëmini iñöminite botö mäninö ante yewämömo aedäni. Minitö edæ wantæpiyæ cöwë mïni quëwenguinö do entawente quëwëmini iñöminite botö, Ëñencäminimpa, ante yewämömopa.

¹⁴Iimai beyænque Wængongui weca guiñënamai pömö imompa. Mönö quiëmë æncæte ante tömengä ingante apänedinque tömengä nänö äno bai ante apänemö ininque tömengä mönö imonte ëñëmaingampa. ¹⁵Ayæ, Mönö imonte në ëñëngongä ingampa, ante ëñëmö ininque mönö, Quiëmë ante apänemö ëñëninque tömengä mäninö mönö äninö ante do pönongä ämö imompa, ante ëñëmaimompa.

¹⁶Minitö mïni töninacä wënæ wënæ cæcä incæ wii tömengä nänö ämæwo wænguinque wënæ wënæ cæcä aminitawo. Mänömai cæyongante në adingä iñömö mäningä beyæ ante Wængongui ingante apänegacäimpa. Apänegä ëñëninque Wængongui

tömengä ingante wantæpiyæ nänö quëwenguinö pönongä æncæcäimpa. Edæ pancadäniya wënæ wënæ nani cædincoo mongänäni incæ wii tömënanäni nani ämæwo wænguinque wënæ wënæ cædänipa, ante botö mäninänique inänitedö ante apänebopa. Wæætë edæ waocä Wængongui Täiyæ Waëmö Önöwoca ingante ancaa Baa Baa äninque tömengä nänö ämæwo wænguinque në wënæ wënæ cæcä ingampa. Ininque botö, Mänömai Baa äninque në wënæ wënæ cædingä beyæ ante Wængongui ingante apänegacäimpa, ante änamai imopa. ¹⁷Quiëmë wiwa cæmö mäninö tömänö wënæ wënæ mönö cædö impa. Wæætë wënæ wënæ cæmö incæte wii tömänö mönö wënæ wënæ cædö beyæ mönö në wænguënëmö bamompa. Pancaa beyænque në wænguënëmö bamompa.

¹⁸Wængongui wënäni nani mempoga ëñagaincabo iñömö godömenque wënæ wënæ cædämai inänipa, ante ëñëmompa. Edæ Wængongui Wengä ëñagaingä inte tömënanäni inänite wææ cædongä ingampa. Ayæ wënæ incæ tömënanäni inänite gampodämai inongä ingampa. ¹⁹Wængongui wëmö imö imompa, ante ëñëmompa. Wæætë wadäni edæ inguipogaque ante në quëwënanäni guiquënë tömënanäni tömänäni wënæ awënë nempo quëwënanäni, ante ëñëmompa. ²⁰Wængongui Wengä do pongä ingacäimpa. Ayæ Wængongui në nöingä ingaingä ingante ate bai pönencäminimpa, ante cædinque tömengä mönö imö pönö odömongä ate ëñëmompa. Tömengä mänömai cæcampa, ante adobai ëñëmompa. Ayæ tömengä në nöingä ingaingä iñongante mönö tömengä Wengä Itota Codito nempo quëwëmompa. Itota Codito nö Wængongui ingaingä ingampa. Ayæ tömengä wantæpiyæ cöwë në quëwengä ingaingä inte pönö cæcä beyænque mönö adobai wantæpiyæ quëwëmö imompa. ²¹Botö wëñämïni bai imïni ëñëdäni. Wadäni, Mönitö wængonguiidi impa, ante nani cönönincoo weca godämai iedäni, ämopa. Mäninque ante yewämömopa.